



**Tussenresultate Persverklaring vir Remgro Beperk
(Remgro)**

INTRINSIEKE NETTO BATEWAARDE-GROEI BLY STERK

- **Intrinsieke netto batewaarde per aandeel neem met 15.7% tot R284.48 toe vir die tydperk**
- **Verdienste per aandeel neem met 11.5% tot 839 sent toe**
- **Wesensverdienste per aandeel neem met 0.1% tot 712 sent af**
- **Tussendividend per aandeel vir die tydperk neem met 8.3% tot 169 sent toe**

Vir die ses maande geëindig 31 Desember 2014 het die meerderheid van Remgro se onderliggende beleggings, goed presteer, maar hierdie wesensverdiensgroei is teengewerk deur ongunstige voorraadherwaardasies in Total South Africa weens die skielike verlaging in die ru-olieprys en billike waardeverliese op Kagiso Tiso Holdings (KTH) se beleggings.

Remgro se intrinsieke netto batewaarde per aandeel het met 15.7% vanaf R245.96 op 30 Junie 2014 tot R284.48 op 31 Desember 2014 toegeneem. Vir die tydperk onder oorsig het verdienste met 11.7% toegeneem en wesensverdienste het onveranderd gebly. Die groei in verdienste is hoofsaaklik vanweë 'n wins wat gerealiseer is met die verwatering van Remgro se belang in Mediclinic vanaf 44.3% na 42.1% wat by die berekening van wesensverdienste uitgesluit word.

Die bydrae tot wesensverdienste deur rapporteringskategorieë word in die tabel hieronder aangebied.

	Ses maande 31 Desember 2014 (R'miljoen)	Verandering (%)	Ses maande 31 Desember 2013 (R'miljoen)	Jaar 30 Junie 2014 (R'miljoen)
Bydrae tot wesensverdienste:				
Voedsel, drank en huishoudelike sorg	974	16.1	839	795
Bankwese	1 347	12.3	1 200	2 542
Gesondheidsorg	670	7.7	622	1 489
Versekering	549	28.9	426	871
Nywerheid	7	(98.4)	446	700
Infrastruktuur	91	31.9	69	166
Media en sport	11	(80.0)	55	64
Ander beleggings	39	11.4	35	59
Sentrale tesourie	57	58.3	36	83
Ander netto korporatiewe koste	(87)	(22.5)	(71)	(134)
Wesensverdienste	3 658	-	3 657	6 635

Die bydrae van **voedsel, drank en huishoudelike** sorg tot Remgro se wesensverdienste het R974 miljoen bedra (2013: R839 miljoen), 'n toename van 16.1%. Hierdie toename is hoofsaaklik die gevolg van 'n hoër bydrae van RCL Foods, wat R473 miljoen tot wesensverdienste bygedra het (2013: R10 miljoen). Daar moet egter op gelet word dat die resultate van RCL Foods vir die tydperk onder oorsig ook nou die resultate van TSB insluit, terwyl TSB afsonderlik in die vergelykende tydperk verantwoord is.

Die bydrae van die **bankafdeling** tot wesensverdienste het R1 347 miljoen (2013: R1 200 miljoen) bedra, 'n styging van

12.3%. Beide FirstRand en RMBH het goeie wesensverdienste-groei van 12.4% en 12.3% onderskeidelik gerapporteer, hoofsaaklik weens groei in beide rente- en nie-rente-inkomste by FNB, RMB en WesBank. Hierdie groei is gedeeltelik teengewerk deur 'n klein toename in jaar-op-jaar uitgawes ten opsigte van krediet-waardedalingskoste.

Mediclinic, Remgro se enigste **gesondheidsorg**belegging, se bydrae tot wesensverdienste het R670 miljoen (2013: R622 miljoen) bedra. Daar moet op gelet word dat Mediclinic se resultate vir die vergelykende tydperk 'n eenmalige verstreke dienskoste-krediet van R172 miljoen ingesluit het. Uitgesluit hierdie eenmalige item sou Mediclinic se bydrae tot Remgro se wesensverdienste met 22.7% vanaf R546 miljoen toeneem het.

RMI Holdings, Remgro se **versekering**belegging, se bydrae tot wesensverdienste het met 28.9% tot R549 miljoen verhoog. RMI Holdings het 'n toename van 13.6% in genormaliseerde verdienste gerapporteer, met al drie bedryfsplatforms, naamlik Discovery, MMI Holdings en OUTsurance wat goeie verdienstegroei van onderskeidelik 20.1%, 10.0% en 14.2% behaal het.

Remgro se **nywerheids**belange het gedempte resultate gerapporteer. Total South Africa se bydrae tot Remgro se wesensverdienste was 'n verlies van R112 miljoen (2013: R123 miljoen wins). Die afname is hoofsaaklik die gevolg van wesentlike ongunstige voorraadherwaardasies in die tydperk onder oorsig, vergeleke met gunstige voorraadherwaardasies in die vergelykende tydperk. Hierdie herwaardasies is die gevolg van die volatiliteit in die Brent ru-olieprys en die rand wisselkoers. Remgro se deel van KTH se resultate het 'n verlies van R62 miljoen (2013: wins van R93 miljoen) bedra. Gedurende die tydperk onder oorsig is KTH se resultate negatief beïnvloed deur die ongunstige billike waarde aanpassing wat verband hou met sy belegging in Exxaro Resources Beperk. Air Products en Wispeco se bydraes tot wesensverdienste het onderskeidelik R108 miljoen en R48 miljoen (2013: R114 miljoen en R53 miljoen) bedra, terwyl PGSI R25 miljoen tot Remgro se wesensverdienste bygedra het (2013: R63 miljoen).

Remgro se grootste **infrastruktuur**belegging, Grindrod, se bydrae tot Remgro se wesensverdienste het R76 miljoen (2013: R45 miljoen) bedra. Hierdie toename was hoofsaaklik weens die sluiting van Grindrod se kommoditeitsverhandeling-afdeling wat swak resultate in die vergelykende tydperk gerapporteer het.

Media- en sportbelange bestaan hoofsaaklik uit die belang in Sabido. Sabido se bydrae tot Remgro se wesensverdienste het R44 miljoen (2013: R79 miljoen) bedra. Ander media- en sportbelange se bydrae tot wesensverdienste was 'n verlies van R33 miljoen (2013: R24 miljoen verlies).

Kontant by die kern het met R340 miljoen tot R2 924 miljoen op 31 Desember 2014 afgeneem. Die grootste beleggings gemaak was in Milestone China Opportunities Fund III (R284 miljoen), Unilever (R258 miljoen), Sabido (R157 miljoen), Community Investments Ventures Holdings (R57 miljoen), KTH (R23 miljoen) en Invenfin (R17 miljoen). Die beduidendste belegging verkoop was dié in Longkloof (R83 miljoen) en uitkerings ontvang vanaf GEMS (R54 miljoen).

Vir die ses maande geëindig 31 Desember 2014, is 'n tussendividend per aandeel van 169 sent verklaar en betaal op 16 Maart 2015 uit inkomstereserwes ten opsigte van beide die gewone aandele sonder pariwaarde en die ongenoteerde B-gewone aandele sonder pariwaarde. Hierdie verteenwoordig 'n 8.3% toename vanaf die tussendividend verklaar vir die ses maande geëindig 31 Desember 2013 van 156 sent per aandeel. Die tussendividend wat betaal is het al die oorblywende SBM krediete benut.

Jannie Durand, hoofuitvoerende beampte van Remgro, sê ter afsluiting: "Ons is bewus van die lae Suid-Afrikaanse BBP (bruto binnelandse produk) groeikoers van tussen 2.0% en 2.5% wat vir 2015 voorspel word. Ons is bekommerd dat die verbruiker swaar kry en dit word deur nywerheidstakings in verskeie sleutel ekonomiese sektore vererger. Remgro het 'n gediversifiseerde beleggingsportefeulje en ons is van mening dat die verklaarde strategieë en besigheidsstandaarde van hierdie besighede bevredigend is."

Kontak: Remgro Beperk
Jannie Durand ((021) 888-3253)

Uitgereik en versprei deur: Keyter Rech Investor Solutions
Marlize Keyter (083 701 2021)

Uitreikingsdatum: 17 Maart 2015

JSE kode: REM

Webwerf: www.remgro.com
